

## 每週經課朗誦經文(巴克禮漢羅/教羅)2014/03/09

### 共同經課 - 1

### 創世記二章十五節~十七節，三章一節~七節

15 耶和華上帝將 hit-ê 人 hē tī 伊甸園，來種作顧守。16 耶和華上帝吩咐 hit-ê 人講，園內 ták 號樹 ê 果子，thang 隨意來食。17 總是分別好 phái<sup>n</sup> ê 樹，伊 ê 果子 m̄-thang 食；因為食 ê 日你的確死。1 耶和華上帝所造山野一切 ê 活物，蛇是比 in khah 狡譎。蛇 tùi 婦人人講，上帝 kiám 有影講，園內一切 ê 樹，lín lóng m̄-thang 食 mah？2 婦人人對蛇講，園內樹裡 ê 果子阮 thang 食；3 只有園中央 hit 叢樹 ê 果子上帝 bat 講，Lín m̄-thang 食伊，亦 m̄-thang 摸，驚了會死。4 蛇對婦人人講，Lín 無的確會死。5 因為上帝知 lín 食 ê 日，lín ê 目睷就會開，lín beh 親像上帝，能分別好 phái<sup>n</sup>。6 婦人人看 hit 叢樹，好食亦合(kah)目；koh hit 叢樹是 thang 欣慕，hō 人有智慧；就挽伊 ê 果子食伊，續 hō 伊 ê 丈夫，伊亦食伊。7 In 兩人 ê 目睷就開，chiah 知 in 是 thng-pak-theh；就 pín 無花果葉，為家已做裙。

### 共同經課 - 2

### 詩篇三十二篇

1 大衛 ê 教示 ê 詩。1) 過失得 tiòh 赦免，罪過得 tiòh 遮蓋 ê，這人有福氣。2 耶和華無算伊做有罪，伊 ê 心無奸詐 ê，這人有福氣。3 我靜靜 ê 時，我 ê 骨頭枯焦；因為我 thong 日大聲哮。4 因為暝日你 ê 手重重 chhìh 我；我 ê 精液變親像夏天 ê 乾燥。[Sè-láh]5 我對你排列我 ê 罪過，無隱瞞我 ê 罪惡；我講，我 beh 對耶和華承認我 ê 過失；你就赦免我犯法 ê 罪。[Sè-láh]6 因為 án-ni，見若虔誠 ê 人，tī thang chhē-tiòh 你 ê 時，tiòh 祈禱你。大水氾濫 ê 時，的確 boē 到伊 hia。7 你是我閃 bih ê 所在；你 beh 庇佑我脫離艱苦；你 beh 用得救 ê 歌四面圍我。[Sè-láh]8 我 beh 教示你，指示你應該行 ê 路；我 beh 注目看你，來勸解你。9 M̄-thang 親像 bé，lô，in 無知識；Tiòh 用 bé-ka-kiu<sup>n</sup> bé-lèk-soh 約束 in，若無，in 就 m̄ oá 近你。10 Phái<sup>n</sup> 人受 choē-choē 苦難；獨獨 oá 靠耶和華 ê 人 beh 有慈愛四面圍伊。11 Lín 義人 ah，tiòh 因為耶和華來歡喜快樂；心正直 ê 人 ah，lín tiòh 出歡喜 ê 聲。

### 共同經課 - 3

### 羅馬書五章十二節~十九節

12 所以親像罪 tùi 一人入世間，死也 tùi 罪入，án-ni 死遍遍到 tī 眾人，因為眾人 bat 犯罪；13 因為律法未到 ê 時，罪已經 tī 世間；獨獨無律法 tī-teh，罪就無算賬；14 總是 tùi 亞當到摩西，連 hiah-ê 無犯罪親像亞當患 tiòh 禁令 ê 款 ê，死也 lóng 管轄 in；亞當是 tè 後到 ê ê 相對。15 但是罪過不比恩賜。因為若 tùi 一人 ê 罪過眾人死，何況上帝 ê 恩典，kap tī 耶穌基督一人恩典中 ê 賞賜，充滿 tī 眾人 ah。16 Koh tùi 一人 ê 犯罪，也不比恩賜；因為審判是 tùi 一人，致到定罪，但是恩賜是 tùi choē-choē 罪過，致到斷做義。17 因為若為 tiòh 一人 ê 罪過，死就 tùi 一人做王，何況 hiah-ê 受恩典 kap 義 ê 賞賜 ê 充滿 ê，beh tùi 耶穌基督一個，tī 活 ê 中間，做王 ah。18 Án-ni 親像 tùi 一 pái ê 罪過有致到眾人受定罪，就 tùi 一 pái 義 ê 所行也致到眾人受擬斷得 tiòh 活。19 因為親像 tùi 一人 ê 違逆 hō 眾人做有罪 ê，就 tùi 一人 ê 順 thàn hō 眾人做有義 ê，也是 án-ni。

### 共同經課 - 4

### 馬太福音四章一節~十一節

1 Hit 時耶穌 hō 聖神 chhoā 到曠野，beh 受魔鬼試。2 已經禁食四十日暝，後來就 iau。3 試 ê oá 來 kā 伊講，你若是上帝 ê Kiá<sup>n</sup>，就教 chiah-ê 石變做餅。但是伊應講，4 有記載講，人 ê 活，m̄-nā oá 靠餅，就是 oá 靠 tùi 上帝 ê 嘴所出 lóng 總 ê 話。5 魔鬼就 chhoā 伊到聖城，hō 伊 khiā tī 殿 ê 尾溜，kā 伊講，6 你若是上帝 ê Kiá<sup>n</sup>，tiòh 家已 tiò 落去；因為有記載講，伊 beh 為 tiòh 你命令伊 ê 天使，In beh 用手扶你，免得你 ê 腳 tak-tiòh 石。7 耶穌 kā 伊講，Koh 有記載講，莫得試主你 ê 上帝。8 魔鬼 koh chhoā 伊上極高 ê 山，用天下萬國 kap in ê 榮光 hō 伊看；9 kā 伊講，你若仆落拜我，chiah-ê 我 lóng hō 你。10 耶穌就 kā 伊講，撒旦，退去；因為有記載講，Tiòh 拜主，你 ê 上帝；獨獨服事 inā-tiā<sup>n</sup>。11 Tùi án-ni 魔鬼離開伊；有天使到，來伺候伊。